

Tekad luar biasa berjaya perangi kartel 'sebesar kontena'

Anwar hargai usaha agensi penguatkuasaan selamatkan lebih RM15.5b dalam tempoh 2 tahun

Oleh Mahani Ishak
mahani@bh.com.my

Bangi: Tekad Kerajaan MADANI memerangi kartel dan penyeludupan adalah langkah luar biasa yang dilaksanakan bagi melindungi bangsa dan negara ini hingga berhasil menyelamatkan lebih RM15.5 bilion dalam tempoh dua tahun ini, kata Datuk Seri Anwar Ibrahim.

Perdana Menteri mengungkapkan, isu kartel dan penyeludupan di negara ini bukan sehalus jarum, sebaliknya sudah sebesar kontena kerana berlaku sejak puluhan tahun, namun tidak dibendung kerana tiada upaya serta tekad politik.


Anwar yang juga Menteri Kewangan, merakamkan penghargaan kepada agensi penguat kuasa seperti Suruhanjaya Pencegahan Rasuah Malaysia (SPRM), Lembaga Hasil Dalam Negeri (LHDN) dan Polis Diraja Malaysia (PDRM) atas sokongan menjayakan tekad kerajaan memerangi kartel itu.

"(Tekad ini bawa) risiko besar kepada SPRM, LHDN PDRM. Semuanya membawa risiko besar kerana isu kartel bukan sehalus jarum, tetapi mereka (kartel sudah) sebesar kontena, tetapi kita sentiasa bertawakal kepada Allah SWT.

"Langkah yang diambil itu langkah luar biasa. Bayangkan berpuluh tahun terbiar dan puluhan bilion ringgit hilang, ukurannya (tekad ini) pada pelaksanaannya dan usaha menyelamatkan bangsa dan negara ini," katanya.

Beliau berkata demikian ketika berucap merasmikan Konvensyen Pengajian Islam Institut Pendidikan Tinggi (IPT) Antarabangsa 2025 di Universiti Kebangsaan Malaysia (UKM) di sini, semalam.

Konvensyen anjuran Jabatan Kemajuan Islam Malaysia (JAKIM) dengan kerjasama UKM dan pelbagai institusi pendidikan tinggi bermatlamat memper-



"Bayangkan berpuluh tahun terbiar dan puluhan bilion ringgit hilang, ukurannya (tekad ini) pada pelaksanaannya dan usaha selamatkan bangsa dan negara ini"

Anwar Ibrahim,
Perdana Menteri

kukuh hala tuju pengajian Islam berteraskan ilmu, amal dan akhlak dalam menghadapi cabaran era digital dan kecerdasan buatan (AI).

Kejayaan tumpas kartel

Justeru itu, Anwar menyelar tindakan segelintir individu yang membisu terhadap kejayaan agensi penguat kuasa menumpaskan kartel dan penyeludupan di negara ini.

"Kalau dengar perbahasan di Parlimen tiada yang bersuara. Boleh dikatakan beberapa Ahli Parlimen penyokong kerajaan, tetapi sebelah sana langsung tiada.

"Saya kata terima kasih SPRM dan polis yang menjalankan tugas menyelamatkan negara kita. Penyeludupan saya sebut di Parlimen, kontena masuk keluar di pelabuhan puluhan tahun dengan seludup masuk dan keluar barang," katanya.

Ketika bercakap di Parlimen baru-baru ini, Anwar memperincikan nilai rampasan dan penalti terkini diperoleh agensi penguatkuasaan terbabit.

"SPRM mengumpul jumlah nilai lucut berjumlah lebih RM8 bilion, ia balik kepada kerajaan dan dimasukkan ke tabung Kementerian Kewangan, ini tak termasuk harta milik, itu ambil masa untuk (proses) lelong dan sebagainya.

"Tahniah juga kepada PDRM kerana peroleh nilai rampasan hasil penyitaan hampir RM4 bilion, Kastam Diraja Malaysia pula berjaya menumpaskan sindiket haram dan penyeludupan dengan nilai rampasan RM2.5 bilion.

"KPDN bersama Suruhanjaya Persaingan Malaysia (MyCC) pula melakukan kutipan penalti RM1 bilion," katanya.

Sementara itu, Anwar menegaskan, Malaysia kekal bebas, merdeka dan berdaulat, tidak pernah tunduk kepada mana-mana negara termasuk Amerika Syarikat, serta bebas menentukan dasar luar sendiri.

Perdana Menteri berkata, walaupun ada kritikan terhadap perjanjian dagang dengan Amerika Syarikat, termasuk eksport RM200 bilion produk Elektrik & Elektronik (E&E) dan Semikonduktor, Malaysia menilai setiap dasar mengikut undang-undang dan kepentingan nasional.

"Malaysia ada perjanjian yang memberi keutamaan kepada Amerika, tetapi tidak ada mana-mana peruntukan yang menghalang kita membuat keputusan berdasarkan kepentingan keselamatan negara.

"Kalau benar kita tunduk kepada Amerika, kenapa pada Ahad (Sidang Kemuncak ASEAN Ke-47 bulan lalu) saya menandatangani perjanjian dengan Presiden (Donald) Trump dan Isnin dengan China? "(Ini kerana) Malaysia ada dasar sendiri mengutamakan kepentingan rakyat," katanya.

Anwar berkata, beliau akan menghadiri Persidangan G20 di Afrika Selatan pada minggu depan, walaupun Amerika Syarikat memboikot untuk hadir, juga bukti Malaysia bebas menentukan agenda diplomatik sendiri.

Dalam pada itu, Anwar menggesa pelajar di Fakulti Pendidikan Islam menggunakan teknologi baharu, termasuk AI sebagai usaha baharu memperkasakan syiar Islam.

"Sebaiknya mereka (pelajar) harus ada juga satu bidang khusus, (sekarang) kita ada multidisiplin ini termasuk soal teknologi komputer AI," katanya.